

Headline	Budak positif HIV diusir dari kampung		
MediaTitle	Harian Ekspres (KK)		
Date	19 Dec 2014	Color	Black/white
Section	Dunia/Asean	Circulation	29,826
Page No	8	Readership	97,836
Language	Malay	ArticleSize	133 cm <sup>2</sup>
Journalist	N/A	AdValue	RM 274
Frequency	Daily (EM)	PR Value	RM 822



## Budak positif HIV diusir dari kampung

BEIJING: Keadaan sedih yang menimpa seorang budak yang positif virus HIV, yang dilaporkan diusir keluar dari rumahnya oleh 200 penduduk kampung, menjadi topik perbincangan hangat di atas talian.

Kes itu mengemukakan stigma yang masih melekat pada HIV di China, di mana ramai pembawa virus atau penghidap AIDS hidup dalam diskriminasi.

Penjaga budak itu, datuk kandungnya, adalah antara penduduk yang menandatangani petisyen untuk mengusir budak berusia lapan tahun itu untuk melindungi kesihatan penduduk kampung.

Media melaporkan budak itu dijangkiti virus itu daripada ibunya, dan didiagnosis ketika dia menjalani rawatan untuk luka kecil pada 2011.

Laporan terdahulu menyebut kanak-kanak itu – yang diberi nama samaran Kunkun oleh media China – tidak dibenarkan memasuki sekolah di sana dan penduduk kampung mengelak daripada

bersentuhan dengannya.

“Tiada yang bermain (dengan saya), saya bermain sendirian,” kata Kunkun, menurut akhbar rasmi Parti Komunis China.

Akhbar tersebut turut melaporkan Kunkun dirujuk sebagai “bom masa” dalam petisyen tersebut.

“Penduduk kampung bersimpati dengannya, dia tidak bersalah, dan dia masih kecil,” kata ketua parti kampung Shufangya, Wang Yishu.

“Namun HIV dan AIDS yang ada padanya menakutkan kami.”

Media melaporkan, ibu kepada budak itu meninggalkan keluarganya pada 2006, sementara bapanya terputus hubungan selepas keadaan Kunkun didiagnosis.

Kes itu mengundang perbincangan umum di alam maya, dengan kebanyakan orang mempersoalkan bagaimana orang boleh bersikap tidak berperikemanusiaan dengan kanak-kanak tersebut.

“Kenapa dia diabaikan dengan kejam, ia tidak adil buatnya,” kata seorang pengguna *Sina Weibo*. – AFP.